

Kerajaan Pahang diminta sahkan status PDF di Bukit Ketam

KUANTAN: Pengumuman kelulusan tapak pelupusan kekal (PDF) sisa pemprosesan nadir bumi yang dikatakan dibina di Bukit Ketam, di sini, sepatutnya diumumkan kerajaan negeri bukan Lynas Malaysia Sdn Bhd (Lynas).

Ahli Parlimen Kuantan, Fuziah Salleh berkata, dalam isu pembinaan PDF terbabit, sebarang keputusan perlu diumumkan oleh Kerajaan Pahang.

Bagaimanapun, Timbalan Menteri di Jabatan Perdana Menteri itu berkata, setakat ini, kerajaan negeri masih belum memberikan kenyataan atau pengesahan bahawa PDF itu akan dibina di Bukit Ketam.

“Dalam soal kelulusan tanah dan tapak, pembinaan PDF perlu dikenalpasti oleh kerajaan Pahang sebelum kebenaran diberikan.

“Lynas pula bukannya kerajaan yang boleh membuat pengumuman kelulusan tapak terbabit hingga menimbulkan kebimbangan orang ramai berhubung pembinaan tapak berkenaan,” katanya pada sidang media selepas majlis jamuan dan sambutan Tahun Baru Cina peringkat Parlimen Kuantan di sini, hari ini.

Yang turut hadir, Ahli Dewan Undangan Negeri (ADUN) Teruntum, Sim Chon Siang.

Sehubungan itu, Fuziah yang juga Timbalan Menteri di Jabatan Perdana Menteri, berkata kajian lebih terperinci perlu dilakukan bagi mengenal

pasti impak terhadap orang ramai dan alam sekitar.

Beliau bimbang kerana tapak PDF di Bukit Ketam itu dikatakan terletak dalam kawasan tadahan air iaitu dekat Sungai Riau.

“Sungai Riau pula ada muka sauk untuk Loji Rawatan Air Bukit Kuantan dan penduduk sekitar FELDA Bukit Goh mendapatkan sumber bekalan daripada loji terbabit,” katanya.

Kelmarin, media melaporkan Lynas mengumumkan PDF di Bukit Ketam yang terletak berhampiran sempadan Pahang dan Terengganu, direka

bentuk untuk menyimpan sisa pembersihan pelunturan air (WLP) daripada operasinya.

Pada Ogos lalu, Kementerian Tenaga, Sains, Teknologi, Alam Sekitar dan Perubahan Iklim melanjutkan lesen operasi kilang Lynas di Kawasan Perindustrian Gebeng, selama enam bulan bersama tiga syarat.

Syarat terbabit termasuk mengenal pasti tapak pembinaan PDF dengan kebenaran bertulis daripada kerajaan negeri, serta mengemukakan kebenaran rasmi bertulis daripada pihak berkuasa negara lain untuk membawa keluar sisa buangan WLP ke negara terbabit.

Sebelum ini, kerajaan Pahang juga mengesahkan sedang meneliti dan menilai kesesuaian kemudahan PDF iaitu dalam proses mengenal pasti kesesuaian lokasi yang dicadangkan oleh Lynas sebelum diberikan kebenaran.

Permohonan Lynas itu juga dirujuk kepada agensi berkaitan termasuk Lembaga Perlesenan Tenaga Atom (LPTA) bagi mengenal pasti tapak terbabit.